

陽春縣志卷九

宦績 寓賢附

前漢書循吏傳六人後漢書十二人上下四百年間僅得此數蓋憂
憂乎其難之矣吾邑於梁陳設太守於唐宋設刺史司馬知州於明
清設知縣以逮佐治各員其政績可紀者凡四十四人不可謂非吾
邑之幸也邑人性質淳良號稱易治而於良有司之去庶道以留建
祠以祀四侯書院賢良祠五循祠蘇公祠先後輝映所以待良有司
者不薄然則廉吏豈真不可為哉一夫得情千室鳴絃繼四十四君
而起者當不乏人也若夫遷客騷人冠蓋所留增重下邑蓋亦足紀
焉世有胡忠簡曹文恪乎當倒屣以迎之

陳

馮僕

子益

卷九

一

唐

馮智戴

陳 謹

姜 晦

宋

薛利和

明

黃景明

趙 清

梁 潛

吳子育

江有源

李 通

李福海

龔 塤

黃 寬

陳 相

吳 銓

程 鑒

楊 瑄

胡兆隆

黃憲清

傅慶貽

雷啓御

錢兆元

王魁春

陳 軾

清

單九翔

張含瑾

劉士課

康善述

李敬修

霍儁韡

陳 詮

蘇 澎

王博厚

李瑞麟

岑理 鍾英 蘇雲 吳璇 卓興
蕭丙塋 董汝礪 楊自明

陳

馮僕高州良德人陳永定二年僕年九歲以母洗氏功拜陽春太守後洗氏復誅歐陽紇僕加封信陽侯子盎字明達隋仁壽間以平寇功累封金紫光祿大夫拜漢陽太守從煬帝伐遼東遷左武衛大將軍隋亡奔還嶺表署酋領有衆五萬番禺新興各賊高法澄洗寶徹等戕殺官吏盎率兵破之寶徹兄子智臣復聚兵拒戰盎進兵始合輒釋胄大呼曰若等識我耶賊衆委戈祖而拜徒衆遂潰擒寶徹智臣等遂有番禺蒼梧珠厓地自號總管或請上南越王號盎曰吾居越五世人生富貴如我希矣常恐忝先業敢自王哉唐武德五年始以地降高祖析為高羅春白崔儋林振八州授盎上柱國封越國公

卷九

二

子智戴最知名

唐

馮智戴以父功拜春州刺史勇而有謀能撫衆得士死力峒帥皆樂屬赴之貞觀初或告盎叛盎因遣智戴入侍後復入朝帝榮賜加等授衛尉少卿帝聞其善兵指雲問曰下有賊今可擊乎對曰雲狀如樹方辰在金金利木柔擊之勝帝奇其對累遷左武衛大將軍卒贈洪州都督

陳讚字昌言福州侯官人登三史料後求便養親為本部長史歷春韶二州刺史所至有善政人孝謙恭居官餘祿悉與宗族親友共之鄉邦稱其高誼

姜晦秦州上邽人以世家子起家恭軍縣令有威惠聲開元初為吏部侍郎主選曹吏為奸晦除之革舊示簡廷議以為非既而贓賂路

塞流品有敍衆乃服後兄皎被放欽州晦亦貶春州司馬常遇旱禱於射木山輒雨因立神祠洞獠出掠晦常提兵陟岡禦之賊遁去遂名將軍嶺云後徙海州刺史卒

宋

薛利和河東人皇祐中知春州秉心耿介涖政清勤新南樓修城門葺府庫建廟屋作勸農亭立招商院得為政之體焉

明

黃景明洪武初知陽春縣廉潔自持寬恕待下與民約信民咸悅服趙清洪武末任陽春知縣為政急於先務增修城池立敵樓時猺寇擾民奏調官軍鎮守民賴以安

梁潛字用之江西廬陵人洪武丙子鄉薦初知四會調陽春所至興利除害政簡刑清公餘輒就學舍與諸生考古證今士林悅服陽春

卷九

三

猺獠環處稍不得所欲輒跳梁不可制潛待之如子而不徇於法民亦盡誠事之奉令惟謹永樂徵修實錄官至贊善有泊菴集行世吳子育樂平人洪武三十二年任陽春縣丞文學飾吏事為知縣梁潛所重時邑未知學子育為誘掖激勸士知所向遂有領鄉薦者江有源江西新喻人洪武時為主簿勤於蒞政均平差役深得民心李通廣西桂林人永樂十二年知陽春持己敦厚處事公平苛政不施士民樂業

李福海湖廣蒲圻人景泰間知縣撫字有方尤加意於庠序秩滿保留再任加六品銜遺愛在民至今不泯

龔埴字伯和江西清江人舉茂才授宗人府經歷卓有聲烈改陽春知縣存心仁恕樹政寬平取予不苟時春俗頑梗埴訓以禮義尤宏獎士類境內翕然向化

黃寬字經裕福建晉江人正德間知陽春公署儒學次第繕完又於厲壇側築漏澤園為政以寬為本而猛於除暴時猺賊剽掠寬率鄉勇討而殲之十四年復隨總督御史楊旦及本道分道剿賊斬其酋蘇萬里馬文廣俘馘甚衆地方以平陞任後邑復多故士民乞留以通判再任數年而去

陳相蘄州人中所百戶輕捷勇敢正德九年自廣西調雷州隨軍調守陽春鳳凰寨時陽春山賊猖獗乘夜來攻相督兵拒之兵潰相挺身力戰刃數賊卒為賊所殺

吳銓字秉衡晉江人以歲貢授陽春教諭循循誨士貧者捐俸給之持已以敬嗜學不倦無惰容無偽言無私謁妄取尋以病卒士人思之祀名宦

程鑒字本虛合肥人博涉經史智畧過人嘉靖間為廣東都指揮僉

卷九

四

事尋充左叅將守肇高雷廉四郡時西山猺賊黎廣等攻劫府帑事聞總兵仇鸞奪俸鑒帥師馳赴陽春遣間招賊誘而破之後討陵崖黎岐斬首三千餘級功冠諸將晉副總兵鑒為將與廣右沈希儀齊名而文學過之所著有雪崖集

楊瑄福建金門所人由電廉叅將於萬歷五年大征西山賊屢立奇功嚴號令信賞罰愛民禮士甚得衆心凱還時紳士為詩歌以餞

胡兆隆萬歷六年由本所總旗以大征西山有功封副千戶即調黃岡所十年五月卒羅定道及守備為之殮殯得士卒心哭聲震動

黃憲清號雙江晉江舉人萬歷八年任時奉例清丈田畝憲清為均平賦役如舊額民德之羅定營兵作亂劫掠旁邑勢猖甚復欲寇陽春憲清集衆防守未幾賊遁去偵者聞賊首諸魁云是縣主廉明嚴肅未可輕犯蓋先聲奪人如此庚子題祀名宦

傅慶貽號有積晉江人丙戌進士萬歷二十年任加意作人文風丕變如楊鳳鳴胡秉忠馮仕琦皆其賞識士也為政公恕廉明催科不擾一切株連概置不問民有貧無以養而父首其不孝者慶貽廉得其情捐俸給之父子感泣甲午調知高要囊橐蕭然尋陞南京戶部主事祀名宦

雷啓御號做弦廣西宣化舉人萬歷二十九年任時璫稅鼎沸羣情洶洶啓御務節省以蘇民困語人曰此時力與角恐焰愈熾百姓益不支寬一分則民受一分之惠如借增稅而陰有侵漁是又一璫也懲黠棍生事尤嚴報最時里民新其輿蓋復任畧用之即藏於庫戒守者曰留俟新官少省加派陞任去百姓思之

錢兆元號淇水浙江仁和舉人萬歷四十四年任每出堂拜天自矢清操雅度民敬愛之鍊於事時適增遼餉以撫字行催科而民不擾

卷九

五

劇賊岑阿四監司屢檄拿不獲兆元設法密擒之邑以安堵報最百姓預乞留不得命及去攀轅絡繹建祠以誌去思云

王魁春號宇皆太倉州人貢生崇禎六年任下車即詢民瘼急興除如振士風則開雲路嚴守禦則置器械全良善則釋株連又捐公費以抵補牛餉設輕監以隔別老囚善政不可枚舉其尤大者鐵爐開鑄陳四不可而詳禁之去之日邑人築書院祀焉

陳軾字同文福建侯官人進士崇禎十三年任平易愷悌開誠布公教民禮讓月課士衡文尚奇崛曰少年文無奇氣難望大成得一才思橫絕者進取未可量也所賞識多釋屨去移番禺政績卓然後擢嶺西巡道尤加惠陽春謝仕歸著作甚富

清

單九翔號四明浙江人拔貢順治十二年任清儉愛民時平靖兩藩

統大師駐省供應不貲九翔處之得宜民以弗困後靖藩移鎮派用夫船費以萬計九翔力爭得少減然由是憤恚病卒貧無以歸櫬士庶捐金賻之且為之誄曰公政寬和公行不苛公形雖沒公德不磨今祀五循祠

張含瑾字荆函陝西潼關衛進士山西蒲州人康熙八年任興利除弊發奸摘伏藏精明於愷悌寓撫字於催科里甲一再見即識其名姓極狡黠莫能欺焉嘗為建昌司理折獄如神迨裁推官補縣令猾吏奸胥無敢玩法強寇拔良概置不問民安盜息至今誦之

劉士課字漢生新會人歲貢生康熙二十年任訓導其學得江門之傳與多士深挈性理多所徹證性恬淡不屑名利三十三年陞福建建陽丞

康善述字達才山西絳州人拔貢生康熙二十五年知縣事時邑中

卷九

六

多盜甫至即紡擒其黨置之法一時奸宄斂迹春俗輕生以誣人者為害最甚善述重懲嚴禁弊俗一變愛民禮士修縣志廢墜俱舉學宮後飛雲聚文樓其所建也在任六載執簡御繁而政事整理擢知河南磁州去有生祠今併入五循祠祀之

李敬修字寅迪山東博興人由拔貢教習康熙三十一年知縣事宅心寬恕居官嚴介左右隸役相戒無敢作奸憐才禮士以文章廉隅婉切砥礪撫字惟勤催科不擾卓有古循良風丁丑歲捐俸作糜粥賑饑又力勸富家出粟全活萬計在任五年興利除害政聲大著及去士民流涕與康善述並祀

霍儁韉字偉卿南海舉人康熙三十九年任教諭刊吾師錄授多士曰使知科舉上更有此學一時諸生多感奮濯磨吾師錄者所輯講道學書也學務躬行教人以敬義夾持復性知本四十二年以病假

歸卒所著更有鐸言四禮準繩順寧錄諸書

陳銓字次臣興寧拔貢生康熙四十三年任教諭文廟祭祀凡百供陳躬親省視必精潔豐腆執事嚴敬倍常待諸生恩義備至訓課諄切著有四書及詩經擬旨任五年以憂去年巳古稀矣

蘇澍字碧泉南河汲縣人進士康熙五十九年任敏捷明斷發奸摘伏出人意料盡役豪右罔敢奸法先是邑刁民以假命誣人輒被傾產澍灼知其情重懲反坐弊始息又善治積盜潛以法除之季春偶早奸民肆掠立擒巨魁亂即弭乙巳奉檄丈田澍照舊額均賦不事紛擾民甚賴之下車時見學宮面湫隘請闢文明門以導秀氣科名由是蔚起丙午引疾去民立生祠以祀今併入五循祠

王博厚字載臣山東黃縣人雍正二年由舉人知縣事無幕友而摘伏如神尤以移風俗舉廢墜為己任甫下車革陋規殆盡建窩舖修

卷九

七

馬路創堆舖獄房皆捐俸為之每接士輒咨以所設施有不便以告即翻然改其虛公納善如此諭民重倫崇樸加意人才教養備至倉邊巷書院田租博厚所置也祀五循祠

李瑞麟江西人丁丑進士英敏廉決治獄有識民無遁情每鞫讞父老扶杖環觀獄成衆皆欣服傳為美談嘗自撰句云留意莫輕殊一點驚心常聽鼓三聲可想見其人也

岑理號粹菴西寧人由庚子孝廉選授陽春司訓課士以誠待人以禮在任十餘年生徒贅修未嘗一掛齒頰諸生有不懷繩尺者必諄諄勸諭之善教感人師儒無忝去之日紳士餞送十餘里

以上錄舊志

鍾英漢軍正白旗舉人嘉慶五年蒞任適陽江莠民蠢動煽及陽春英鎮靜臨事民不騷擾賊氛亦息性仁慈折獄不用刑訊知陽春數月去士庶攀轅絡繹不絕

蘇雲三水人嘉慶十六年任陽春營守備恩威並濟賞罰嚴明初陽春營隸高州鎮管轄鎮署官兵因公道過邑境必苛索供應各營汎苦之雲稟請移隸肇慶協此弊遂革營兵感其德釀金建生祠祀之即今城內馬房巷蘇公祠也

吳璇號紫蘊浙江新城舉人咸豐十一年蒞任逾年正月狁匪衆號數萬撲攻縣城轟塌城南角九丈餘璇率紳民拒守一面堵以木板一面募死士開城擊匪隨在城上發大礮斃匪百餘匪不能逞旋引退城賴全匪退修補城缺數日功竣復加築炮臺七座馬道磚堆五百餘所城益完固亂平後璇以咸豐五年拆造縣城及此次守城禦匪皆士民之力合併詳請獎叙而口不言已功知縣事數年靖亂安民百廢俱舉試士尤精衡鑒

卓興號杰士潮州人由行伍積功擢至副將隨崑宮保肅勦平高州

卷九

八

髮逆晉總兵官同治二年奉檄來兩陽勦匪時狁匪衆號十餘萬自恩平竄陽春徧擾上三都及陽江邊境侯都司勉中率兵三千由肇慶至匪退屯下二都企塢黃強又分隊踞三甲所至任意焚殺侯都司力不能及興駐營雙捷三年正月邑紳乞師興督兵進勦一戰而匪之精銳悉殲再戰而邑之全境盡復尾追至恩平五坑搗滅匪巢戡定狁亂功冠一時邑拔貢教雍鳴有卓將軍歌以紀其功

蕭丙塲號文峯湖南善化人監生由軍功保舉光緒二年知陽春縣事甫下車即倡修文廟創建試院議修邑志百廢具舉而性尤慈祥勸民息訟民多化之常捐廉俸增廣書院膏火及甄別獎額以栽培士類文風益振先是催征糧稅給比照與差向民戶催納填照時必多方勒索民不堪其擾塲革其弊分設糧站由各業戶赴納邑民稱便時有奸僧倡白蓮邪教感民斂財塲不動聲色密擒置之法地方

賴安治春八年以調高要去去之日邑士庶以袍緞贈行攀轅絡繹後署肇慶高州等知府

董汝礪號逸峯安徽合肥人拔貢生光緒間三署縣事政平訟理以剔除弊習為先務而尤敬禮賢士大夫終身廉潔自矢試士能拔取真才卒於任

楊自明貴州人附生光緒二十八年署縣事治事明察案無留牘獄無遁情性方剛不避權貴試士公允任一年調去

以上錄採訪冊

寓賢

宋

胡銓

明

沈思考

卷九

九

清

連城璧

葛祖亮

曹秀先

宋

胡銓字邦衡號淡菴廬陵人建炎二年擢進士第五人後為樞密院編修官紹興八年金使至以詔諭江南為名銓上書力排和議乞斬秦檜王倫孫近三人頭竿之藁街檜以銓狂妄凶悖謫監廣州鹽倉踰年改判威武軍十二年諫官羅汝楫劾銓飾非橫議詔除名編管新州又移謫吉陽軍取道春州喜山水秀麗士民淳樸留連者久之有簡陽春邑宰及鐵坑山詩二十六年檜死量移衡州乾道初入為工部侍郎七年以資政殿學士致士卒諡忠簡

明

沈思考字純甫平湖人別號繼山隆慶戊辰進士初令番禺陞刑部

主事萬歷丁丑大學士張居正父喪奪情時翰林吳中行趙用賢疏論忤旨大學士王錫爵侍讀趙志臬詣相府求救不得中行用賢皆杖為民思考發憤與員外郎艾穆上疏以為社稷之命脈在綱常而羽翼綱常者在輔相三年之喪上自天子若輔相可託權變強顏就列異時國家大慶賀大祝祭避之不可出之不安居正何以自處徐庶為母曰方寸亂矣居正獨非人子而方寸不亂耶陛下令其舉賢自代可也令其居憂怨艾易自用之心而變申韓之學服闋起復可也臣聞聖帝體臣之情未嘗奪之臣亦求申其情於君未嘗肯為所奪奪之一言何以教天下上怒皆杖遣戍穆戍潯州思考戍高州神電衛嘗寓陽春愛崆峒巖風景流連不忍去有序記及題詠與高明區大相相賡和而崆峒勝概始見所謂景因人著也及居正歿召還拜京兆尹累遷少司馬

卷九

十

連城壁江西金谿人崇禎庚辰進士十六年任靈山縣耿介端方鄰縣巨寇韋兒黃應秀越境流劫繕城池練鄉勇增設汛兵分險守禦民賴以安建社學勤月課士風丕變擢監察御史順治十八年安置陽春與邑人謝凝之江巖叟相唱和康熙元年奉旨黃冠歸里士類榮之

葛祖亮號聞橋江寧人登雍正壬子乾隆丙辰鄉會榜官祠祭司主事尋以病解組歸為諸生時即遊蹤遍天下乾隆丙子二月來陽春年七十四矣登臨健捷不異少壯途中遇佳山水輒停舟流連不忍去詩文藻麗中骨力清挺不墮六朝金粉習氣與人交久而愈可敬慕

曹秀先號地山江西新建人由乾隆丙辰翰林擢浙江道監察御史轉刑科給事中家藏書甚富詩文膾炙人口書法尤精絕戊寅五月

來遊陽春翰墨留題爭相寶貴有不得者輒曰猶望地山重至也後
歷官禮部尚書卒諡文恪

以上錄舊志

卷九